



**COMUNU DE CERÀXIUS**  
**Tzitadi Metropolitana de Casteddu**

**Àrea 3 – Abogadura Comunalì – Ufitziu Afaris Legalis**

**AVISU ESPLORATIVU**

**PO MANIFESTADA DE INTERESSAMENTU FINALIZADA A S'AFILLAMENTU DE SU CUNTENTZIOSU APITZUS DE VIOLADURAS DE SU CÒDIXI DE S'ARRUGA**

Si fait sciri chi s'Aministratzioni Comunalì de Ceràxiu bolit cumintzai unu scrucullu de mercu, sceti po connoscèntzia, cun sa tarea de agatai sugetus califcaus po s'afillamentu de su Cuntentziosu apitzus de violaduras de su Còdixi de s'arruga, po su tempus de unu annu, po mesu de affillamentu deretu cunforma a s'art. 36, c. 2, lit. a) de su Dlgs 50/2016.

Fait parti intrea e de fundòriu de custu avisu, su mòdulu alliongiau.

**AMINISTRATZIONI PROCEDENTI**

Comunu de Ceràxiu - Àrea 3 - Ufitziu Afaris Legalis  
bia Istria, 1 - 09047 Ceràxiu - Tzitadi Metropolitana de Casteddu  
Còdixi Fiscali 80002090928 - Partita IVA 00542650924  
Pec: [protocollo@pec.comune.selargius.ca.it](mailto:protocollo@pec.comune.selargius.ca.it)  
Giassu Internet: [www.comune.selargius.ca.it](http://www.comune.selargius.ca.it)

**RESPONSÀBILI DE SU PROCEDIMENTU**

Diretori Àrea 3 - dotoressa Regina Vittone - 070/8592292 -  
[regina.vittone@comune.selargius.ca.it](mailto:regina.vittone@comune.selargius.ca.it)

**OGETU DE S'ARRENDU E MANERAS DE CUMPRIDURA DE SU SERVÌTZIU**

Su ServìtzIU ogetu de s'arrendu imbòrdigat:

- sa gestioni de su cuntentziosu: rapresentàntzia in giuditziu, patrocìniu legali, assistèntzia e amparu in totus is giuditzius apitzus de violaduras de su Còdixi de s'Arruga aundi s'Enti fait parti, e chi s'ant a impreai in su tempus de affillamentu;
- s'agiudu giuridicu/legali a su Cumandu de sa Polizia Locali de su Comunu de Ceràxiu apitzus de su currìgiu de is àutus e/o de sa procedura de impreai a amparu de s'Enti e cun is tareas de sa prebènnida de su cuntentziosu.

S'incàrrigu de rapresentàntzia e de amparu càstiat siat sa costitutzioni in giuditziu, siat s'acontèssiu de ativatzioni de su giuditziu e iniziativa de su Comunu de Ceràxiu. S'incàrrigu imbòrdigat, in prus de s'amparu tènnicu, puru dònna assistèntzia de allega legali castiendi sa chistioni dedota o no dedota in giuditziu.

S'Aministratzioni at a podi pediri a su Professionista acramamentus scritus castiendi a su profetu de apariciai e/o sighiri in giuditziu, de addivenire a transidura, de amostai chèscias

a pitzu de dònna àutu, cumpriduras o cumportamentus chi, a pustis de su cumintzu de su giuditziu, S'Aministratzioni at a depi impreai po amparu e garantzia de is interessus e deretus cosa sua. De dònna manera, su professionista bolit presentai po iscritu a s'Aministratzioni dònna solutzioni tènnica cunsiderada profetosa a ndi amparai a su mellus is interessus e a prebenni pregiudìtzius, cumprèndius puru inditaduras e cumandus arrechedi po donai cumpridura intrea a is pronùntzias giurisditzionalis. S'aministratzioni tenit su scioberu de torrai a pediri a su legali incarrigau parris scritus de donai in s'allega ogetu de custu Capitolau apoderaus de caminus normativus e giurisditzionalis.

Po su cumprimentu de is atividadis numenadas innoi asuba depint èssiri asseguradas po totu su tempus de cumprimentu de su servitziu:

- s'imbordigamentu po parti de su legali, si serbit, de ndi assegurai sa presèntzia cosa sua anca funt is ufitzius comunalis, po acaramentus eventualis, po su tempus chi serbit po acabai sa faina;
- s'imbordigamentu de su legali incarrigau a fai relatas dònna tanti a pitzu de su stadu de is afaris giuridicus cumintzaus e a pompiai sempri informau su Comune, deretu a s'Àrea cumpetenti e a s'Ufitziu Afaris legalis, po cussu chi pertocat a s'atividadi fata dònna borta, aturendi atentus a torrai a ponni a lestru una còpia de dònna àutu prodùssiu in giuditziu e donendi parris, siat scritus e siat a boxi, apoderaus de riferimentus normativus e giurisprudenzialis, po cussu chi pertocat a sa cunduta giuditziali mellus e/o stragiuditziali de tenni po parti de s'Enti;
- sa sinnaladura de is àutus prus profetosus po straviai dannus o cresciduras de is gastus, processualis puru, e a impreai totus is medidas e is stremus profetosus po sa serrada lestra de is giuditzius cumintzaus;
- donai, a s'acabu de dònna gradu de giuditziu, a s'ufitziu cumpetenti una comunicatzioni dereta in paris cun una relata pitica;

Su legali incarrigau no at a depi pigai, po totu su tempus de s'affillamentu, nisciunu traballu, nè deretu e de ponendi in mesu atra genti, po sa rapresentàntzia e s'amparu in stremus giuditziàrius e stragiuditzialis cuntra de su Comune de Ceràxiu, cun sa tarea de straviai incompatibilidadi e violaduras de su còdixi deontològicu.

Su legali incarrigau no at a depi tenni atrus traballus chi potzant bessiri a foras, furalmenti o sostanzialmenti incumpatibilis cun s'interessu de s'Enti.

#### **BALORI DE S'ARRENDU:**

€ 20.000 (bogaus giai is dèpiris aciuntus e IVA) agatau, cunforma a su D.M. 10 de martzu 2014, n. 55, compiendi in conca su balori carculau de giai:

- 45 càusas, chi si fichint aintru de su scaglione finsas a is 1.100,00 de is baloris mesanus acurtzaus, in dònna boxi, de una percentuali de su 10%, cunsiderendi sa simpresa de is càusas;
- n. 5 càusas chi faint parti de su scaglione de € 1.101 finsas a € 5.200, de is baloris mesanus acurtzaus, in dònna boxi a sola, de una percentuali de su 10%, cunsiderendi sa simpresa de is càusas.

Su tanti carculau a basi de asta at a essi asugetau a su imbasciamentu.

#### **TEMPUS DE S'INCÀRRIGU**

S'incàrrigu tenit su tempus de 12 mesis cumintzendi de sa firma de su cuntratu po parti de su professionista, a foras de una bogadura po parit de s'Aministratzioni po una arresoni bàlida. Is arrehèscias no ancora acabadas a sa dii de scadèssida de su cuntratu, ant a essi

acabadas de su legali arricidori de su servìtziu finsas a sa publicatzioni de sa sentèntzia chi definit su gradu de giudìtziu chi s'est fendi candu si serrat su cuntratu.

### **SUGETUS AMÌTIUS A PIGAI PARTI A SU SCIOBERU**

Nci podint intregai sa manifestada de interessamentu is sugetus numenaus in s'art. 45 de su D.Lgs. 50/2016.

### **REQUISITUS DE ÒRDIS GENERALI PO S'AMITIDURA A SU SCIOBERU**

Is pedidoris, po podi èssiri amìtius a sa circa de mercau, ant a depi autocertificai sa farta de arresonis de bogadura cunforma a s'art. 80 de su d. Lgs. n. 50/2016

### **REQUISITUS DE ÒRDIS SPETZIALI PO S'AMITIDURA A SU SCIOBERU**

Su pedidori a solu, cunforma a s'art. 45, comma 2, literas a), b), c) de su D. Lgs 50/2016, po podi èssiri amìtiu a sa circa de mercau, at a depi autocertificai:

1. s'iscritzioni a s'albu professionali de is abogaus;
2. sa esperièntzia professionali cumprovada , amostada cun a su mancu 10 càusas in totu cumintzadas in su tempus intre sa 1<sup>a</sup> de Cabudanni 2017 e su 16 de mes'e ladàmini 2020, acrarendi, po dònna càusa, su Foro imbordigau, su nùmeru de arrolu, sa allega e sa parti agiudada, e imperendi sceti su schema alliongiau innoi. Cun custa tarea si acrarat chi:
  - po tenni cussu requisitu, s'at a castiai s'annu de iscrizioni a arrolu de sa càusa;
  - no est pediu unu nùmeru minimu de càusas patrotzinadas po dònna annu a solu;

### **TRÈMINIS E MANERAS DE TRASMITIDURA DE SA MANIFESTADA DE INTERESSAMENTU**

Cussus interessaus a pigai parti a sa procedura in ogetu depint amostai s'interessamentu insoru cun dimanda apòsita de imbiai cun su curreu eletrònicu certificau a s'indiritzu protocollo@pec.comune.selargius. ca.it cun noda scritta in lingua italiana cunforma a su mòdulu alliongiau, de imbiai a su Comunu de Ceràxiu - Àrea 3 -, **aintru de su trèmini frimu de is 24.00 oras de sa dii 16/10/2020**, a pena de bogadura de su scioberu, cun custu ogetu:

*“MANIFESTADA DE INTERESSAMENTU PO AFILLAMENTU DE SU CUNTENTZIOSU APITZUS DE VIOLADURAS DE SU CÒDIXI DE S'ARRUGA”.*

No ant a èssiri arricias is manifestadas de interessamentu lòmpias a pustis de sa dii cumandada, mancari si de aciunta o de arremprasu de una prus bècia, aturendi **sa lòmpera** de sa missada **a perìgulu escludori de su imbiadori** aundi po calisiat arresoni cussu no lompat aintru de su trèmini perimìtiu a s'indiritzu scritu asuba.

Po custa tarea at a èssiri proa sceti sa dii e sa ora de lòmpera de sa missada certificada a sa casella PEC de s'Enti.

Sa missada at a depi tenni cumentis allongiaus sceti su mòdulu po manifestai s'interessamentu cosa sua, scritta in su mòdulu alliongiau , firmada de manera digitali po parti de su legali rapresentanti de su pedidori o de unu procuradori (intzaras bandat imbiada sa procura chi ddi pertocat), cumentis puru sa còpia de su documentu de identidadi de cussu chi firmat.

## **MANERAS DE SCIOBERU DE IS CUNCURRENTIS DE CUMBIDAI A ENTREGAI OFÈRRIDA**

Sa Statzioni arrendadora at a depi fai, in setziada resguardada, a averigui sa curregidura e sa cumpridura de is istantzas lòmpias e sa presèntzia de is requisiti mìnimus de partecipazioni pedius, sighendi is autocertificatzionis prodùssias.

Is arresultaus de is averiguaduras ant a essi postus in unu verbali apòsitu, aundi ddoi at a èssiri s'elencu de is pedidoris bessius idòneus a pigai parti a sa procedura di gara sighidora.

Si is pedidoris bessius idòneus ant a essi prus de CINCU, sa Statzioni arrendadora at a fai una valutazioni de su curriculum professionali in formau europeu (aundi ponni puru titulus universitàrius eventualis, publicatzionis scientificas e atividades de consulèntzia) e de su nùmeru de is càusas patrotzinadas chi pertocant a violaduras de su Còdixi de s'Arruga, agatendi CINCU sugetus de cumbidai a sa procedura negotziada sighidora.

Si is pedidioris bessius idòneus siant prus pagu de cinqu, ant a essi amìtius totus a sa procedura negotziada. Is sugetus agataus ant a essi cumbidaus a entregai ofèrrida imperendi sa piatafurma Sardegna Cat, imbiendi sa pedidura de ofèrrida (RdO); totus is documentus de gara ant a essi imbiaus in paris cun sa RdO.

Is datus de is sugetus pedidoris ant a essi impreaus, cunforma a su Regulamentu UE 2016/679, sceti po is tareas alliongiadas a su cumprimentu de custa procedura.

## **CRITÈRIU DE AGIUDICATZIONI**

S'agiudicatzioni at a èssiri fata cun su critèriu de **s'ofèrrida prus profetosa** economicamenti, est a nai cussa cun su prètziu prus baratu, cunforma a s'art. 95, comma 4, de su D. Lgs. 50/2016

## **ATRAS INFORMATZIONIS**

Custu avisu no est unu cumbidu a pigai parti a sa procedura de afillamentu, ma bolit sceti arriciri manifestadas de interessamentu po parti de is sugetus idòneus a pigai s'arrendu poita tenint totus is titulus pedius, po favoressi sa partecipazioni e su pregontu de su nùmeru prus mannu de operadoris econòmicus chi podint essi interessaus de manera no vinculadora po su Comunu de Ceràxiu, arrespetendi totus is allegas de economicidadi, profetu, imparzialitàdadi, paridadadi de tratamentu, trasparèntzia, proportzionalidadadi, publicidadadi.

Cun custu avisu no benit apariciada nisciuna procedura de gara e no funt previdias graduatòrias de mèritu o de spartzidura de puntègiu.

Sa Statzioni arrendadora si chistit su scioberu, a giuditziu insindacàbili cosa sua, siat de no sighiri a innantis cun sa cumpridura de su scrucullu de mercäu, siat de no sighiri a s'arrendu; de custa manera nisciunu de is cuncurrentis at a podi pediri nisciunu arrembursu po dannus a calisiat titulu.

Po calisiat informatzioni is interessaus ant a podi tzerriai:

- a sa dotoressa Roberta Matta, telèfonu 070/8592208, indiritzu de curreu eletrònicu [roberta.matta@comune.selargius.ca.it](mailto:roberta.matta@comune.selargius.ca.it)

- a sa dotoressa Regina Vittone, telèfonu 070/8592292, indiritzu de curreu eletrònicu [regina.vittone@comune.selargius.ca.it](mailto:regina.vittone@comune.selargius.ca.it).

Ceràxius, 1.10.2020

**SU DIRETORI ÀREA 3**  
***Dot.ssa Regina Vittone***